



Қазақстан Республикасы
Президентінің Жарлығы

**Жұмысшы
мамандықтарының
жылын жариялау туралы**

2024 жылғы 27 желтоқсан

Жұмысшы мамандықтарының беделін арттыру және техникалық және кәсіптік білім беру жүйесінің реформасын жүзеге асыру мақсатында ҚАУЛЫ ЕТЕМІН:

- 2025 жылғы Жұмысшы мамандықтарының жылы деп жариялансын.
- Қазақстан Республикасының Үкіметі Жұмысшы мамандықтарының жылын өткізу бойынша қажетті шараларды қабылдасын.
- Осы Жарлықтың орындалуын бақылау Қазақстан Республикасы Президентінің Әкімшілігіне жүктелсін.
- Осы Жарлық қол қойылған күнінен бастап қолданысқа енгізіледі.

Қазақстан Республикасының
Президенті Қ.ТОҚАЕВ

Астана, Ақорда,
2024 жылғы 25 желтоқсан
№744



Ақмешіт

28 желтоқсан
сенбі
№102 (2112)
2024 жыл

Газет
1994 жылдың 15 сәуірінен
бастап шығады

• Қалалық қоғамдық-саяси әлеуметтік-
ақпараттық тарихи-танымдық газет •
E-mail: akmeshit.kz@mail.ru

апталығы

ЕЛДІГІМІЗДІ ТАНЫТҚАН ЕРЕН ЖЫЛ

Мемлекет басшысы Қасым-Жомарт Тоқаевтың елімізді дамыту мен өркендету жолында жыл бойы атқарған қызметіне шолу жасап, қоғамдық-саяси өмірдегі, әлеуметтік-экономикалық дамуға іргелі өзгерістер мен табыстарға қысқаша тоқталуды жөн көрді.

Президент биыл жұмыс сапарымен еліміздің 11 өңіріне барды. Аймақтардағы 60-тан аса өндірістік және әлеуметтік-мәдени нысандармен танысып, жұртшылықпен кездесті. Сондай-ақ ел ішіндегі 41 іс-шараға қатысты. Олардың қатарында форумдар, кенестер, отырыстар секілді түрлі форматта өткен жиындар бар. Еліміздің саяси және қоғам қайраткерлерімен 137 кездесу өткізді.

Мемлекет басшысы осы жылы 3 979 құжатты қарап, қол қойды. Оның ішінде 95 заң, 319 жарлық, 81 өкім, 28 отырыс хаттамасы, 3 456 қызметтік құжат қабылданды (25 желтоқсандағы мәлімет бойынша).

Сыртқы саясатта да жемісті жыл болды. Атап айтқанда, Қасым-Жомарт Тоқаев биыл 23 рет шет мемлекетке сапарлады, 19 халықаралық форум мен саммит жұмысына атсалысты. Халықаралық іс-шаралар аясында өзге елдің басшыларымен 27 рет кездесті. Сондай-ақ шет мемлекеттердің және үкіметтердің басшыларымен, басқа да жоғары лауазымды тұлғаларымен, халықаралық және өңірлік ұйымдардың жетекшілерімен, бизнес-қоғамдастық өкілдерімен 84 кездесу өткізді. 22 мемлекеттің елшісінен сенім грамоталарын қабылдады. Мемлекет басшыларымен 49 мәрте телефон арқылы сөйлесті.

Енді осы сандармен өрнектелген жұмыс кестесінің барысында ел игілігі үшін жасалған істерге назар аударайық.

Ең әуелі, жыл басындағы ақжолтай жаңалықты айта кеткен абзал. Президент Қасым-Жомарт Тоқаев 9 қаңтарда «Алматы облысының әкімшілік-аумақтық құрылысындағы өзгерістер туралы» Жарлыққа қол қойды. Жетіген ауылы Алатау қаласы болып қайта құрылды. Осылайша, келешекте Алматы мен Қонаевтың ортасында бой көретін Alatau City қаласының іргесі қаланды. Бірнеше жылдан бері талқыланып келе жатқан жаңа урбанистік жобаны жүзеге асыруға шетелдік инвесторлар айрықша қызығушылық танытып отыр. Президент Сингапур сапарында және одан кейін де әлеуетті инвесторлармен кездесіп, Алматы агломерациясын өркендеген экономикалық аймаққа айналдыруды көздейтін жобаның жай-жапсарын талқылады.



ҰЛТ ҰПАЙЫН ТҮГЕНДЕГЕН ҚҰРЫЛТАЙ

Елдік мәселелер қозғалатын Ұлттық құрылтайдың үшінші отырысы биыл көне Сарайшық жұртында – Атырау облысында өтті. Құрылтайда ұлт болмысын қалыптастыратын тәуелсіздік пен отаншылдық, бірлік пен ынтымақ, әділдік пен жауапкершілік, заң мен тәртіп, еңбекқорлық пен кәсіби біліктілік, жасампаздық пен жанашылдық секілді басты құндылықтар айқындалды. Сонымен қатар Президент бес әлеуметтік кеселмен күресті күшейту жөнінде нақты тапсырма берді. Осыған орай, биыл Әйелдердің құқықтары мен балалардың қауіпсіздігі туралы Заңға қол қойылды. Яғни тұрмыстық

зорлық-зомбылық үшін қатаң жаза белгілейтін, балалар құқығының қорғалуын қамтамасыз ететін жаңа нормалар енгізілді. Бұдан бөлек, Адам саудасына қарсы іс-қимыл туралы арнайы заң қабылданды. Вандализм мен өзгені мүлкіне зиян келтіргені, қоғамдық тәртіпті бұзғаны үшін жауапкершілікті күшейтуге, құмар ойынға тәуелділікті азайтуға, вейікке тыйым салуға бағытталған заңнамалық өзгерістер жасалды. Аталған бастамаларға қатысты заң жобаларын әзірлеуге Парламент депутаттарымен қатар, Ұлттық құрылтай мүшелері де белсенді атсалысты. Осылайша, Президент үнемі айтатын «Заң мен Тәртіп» үстемдігі қоғамда біртіндеп орнығып келеді.

2-БЕТТЕ

Баспасөз-2025

**АҒАЙЫН,
«АҚМЕШІТ АПТАЛЫҒЫНА»
ЖАЗЫЛДЫҒЫЗ БА?**

Баспасөзге 2025 жылдың бірінші жартыжылдығына жазылу жүруде. Қапы қалмаңыз, сүйікті газетіңізге жазылуды ұмытпаңыз.
Жекелер үшін
6 айға – 3000 теңге, мекемелер үшін – 4000 теңге.
Баспасөзге қатысты сауалдарыңыз болса, мына нөмірлерге хабарласыңыздар:
40-05-81, 70-14-08.

ШАТТЫҚҚА ТОЛЫ ШЫРША ТОЙЫ

Осы аптада Өнер орталығында шаһар басшысының бүлдіршіндерге арналған жаңа жылдық кеші өтті. Жаңа жылдық шырша барша балдырғанды қуанышқа кенелтті. Өнер орталығының іші жұмбаққа толы таңғажайып ертегілер әлеміне айналды. Сән-салтанатқа толы мерекелік шараға оқуда озат, спортта, өнерде алда жүрген оқушылар мен әл-ауқаты төмен көпбалалы отбасының балалары қатысты. Көңілді өрілген мерекеге қала мектептерінен 100-ге жуық бала қатысты.

Шырша тойына қала әкімі Нұржан Ахатов қатысып, бүлдіршіндерге ізгі лебізін жеткізді.

– Баршанызды үлкен үміт отын жағатын, қуаныштан, махаббаттан бастау алатын, айналага нұр болып шашылатын, әрбір шаңыраққа шуақ болып тарайтын шыршайы сәт – Жаңа жыл мерекесімен шын жүректен құттықтаймын.

Ел Президентінің тапсырмасымен Қазақстанның түкпір-түкпірінде, біздің қаламызда жаңа мектептер, білім беру нысандары ашылып, көптеген ойын алаңы салынууда. Биыл облыс көлемінде «Жайлы мектеп» ұлттық жобасымен бой көтерген 21 мектептің алғашқысы Сыр өңірінің бас шаһарында ашылып, шәкірт қабылдады. Заманауи үлгідегі 350 орындық «Оқушылар сарайы» пайдалануға берілді. Бәріне бақытты балалық шақ, жарқын болашақ тілеймін. Жаңа жыл құтты болсын! – деді шаһар басшысы.



Мерекелік кешке келген балалар ойын ойнап, ән шырқайды, театрландырылған қойылым тамашалады және естелік сыйлық алды. Өлемі кештің куәсі болған баланың бірі – Б. Шалғынбаев атындағы №217 ІТ мектеп-лицейінің 7-сынып оқушысы Асманұр Төрехан.

– Жаңа жылдық мерекеге қатысқанымға қуаныштымын. Мектептің үздік оқушысы ретінде мені таңдағаны үшін ұстаздарыма рахмет айтамын. Жаңа жыл мерекесін оқушылар асыға күтеді. Жаңа жыл жаңа үміттің белгісі, жаңа арман-мақсаттарға

жол бастайтын қуанышты мереке. Жаңа жылда жақсылықтар көп бола берсін, – дейді ол.

Асыға күткен мерекелік шараға балғындар түрлі дайындықпен келгені байқалады. Олардың мерекелік костюмі өздеріне жарасып-ақ тұр. Бүлдіршіндер сан алуан ойыншықпен безендірілген шыршаны ерекше қуанышпен айналып жүр. Аяз ата мен Ақшақар да қоржынын түрлі тәттіге толтыра келген. Әсем ән, жаңа жылдық би бүгінгі мерекенің шыршайын келтірді.

Айтөлкын АЙТЖАНОВА

Ауыл тұрғындарының тұрмыс жағдайын жақсартуға бағытталған «Ауыл аманаты» жобасы көпшілік көкейіне үміт отын жақты. Мемлекет басшысының «Халықтың табысын арттырудың 2025 жылға дейінгі бағдарламасы» аясында қабылданған бұл жоба өзінің өміршеңдігін көрсетті.



«АУЫЛ АМАНАТЫ» АУЫЛҒА НЕ БЕРДІ?

Үміт артқан жоба

«Ауыл аманаты» жобасы – ауылды дамыту жөнінде 2023-2027 жылдарға арналған тұжырымдамасы аясында жүзеге асуда.

Ресми деректерге сүйенсек, ауылдарда 7,7 миллион адам тұрады. Бұл халықтың 41 пайызын құрап отыр. Қазіргі уақытта ауыл және қала тұрғындары табысының айырмашылығы – 38 пайыз. Сондықтан ауыл тұрғындарының әл-ауқатын жақсарту бағытында жобаның маңызы зор. Жоба бойынша 2029 жылға дейін ауылдарда 350 мың жаңа жұмыс орнын ашу жоспарланған. Осының негізінде 1 миллион ауыл тұрғыны жұмыспен қамтылады. Ал осы мақсаттағы жұмысқа мемлекеттік бюджеттен бір триллион теңге көлемінде қаражат бөлінген.

Жақында «Ауыл аманаты» жобасының нәтижелерін қорытындылап, алдағы уақытта атқарылар жұмыстарды пысықтау үшін Қызылорда облысында республикалық семинар өтті. Семинар барысында ҚР Премьер-министрінің орынбасары Тамара Дүйсенова бағдарламаны дамыту мақсатында «AMANA» партиясымен бірлесіп, ауқымды жұмыс атқарылғанын айтып өтті. Атап айтсақ, бұл жоба арқылы 16 мың шағын несие беріліп, 17 мыңнан аса жаңа жұмыс орны құрылған.

– Келесі жылға ауыл шаруашылығы министрлігі 50 млрд теңге бөлсе, 2026 жылы да осынау қаржы қарастырылады. Оған несиелерден қайтарылған қаражат қосылады. Аймақтарға бұл қаржы бірнеше талаптарды ескеріп, берілуі. Ұсынылатын жобаларда өндіріс пен өнім өткізудің нақты схемасы болуы қажет. Несие беру, қайтару және оны алушыларды есепке алатын ақпараттық жүйе орнатылуы тиіс. Бөлінген қаражаттың 20% ауыл шаруашылығы техникасының лизингіне, тағы 20% қайта өңдеуге, 60% басқа да бағыттарға, – деді Тамара Дүйсенова.

«Ауыл аманаты» жобасының алдағы уақыттағы басты мақсаты – диканның өнімін тұрақты өткізу жолын табу арқылы табысын көбейтуге жол ашу. Вице-премьер бұл міндетті іске асыру үшін жауапкершілік ауылдық округтердің, аудандар мен облыстардың әкімдеріне жүктелетінін атап өтті.

4-БЕТТЕ

2025 ЖЫЛ: АЙЫППҰЛ ҚАНШАҒА ӨСЕДІ?



Сәл қисық кетсең, қалтаңа салмақ түседі. Өзі жұқарған қалта тесілуге айналды. Әлеуметтік желіні ашсаңыз, жүрсен де айыппұл, тұрсаң да айыппұл. Айыппұлдан қажыған халық тіпті «Штрафстан» деп видео түсіріп, пікір қалдыратын болды. Ал жыл сайын айлық есептік көрсеткіш өскен сайын айыппұл да соған сай көтерілетіні анық. 2025 жылы 1 қаңтардан бастап айлық есептік көрсеткіш өткен жылғыдан 6,5 пайызға жоғары болады деп жоспарлануда.

4-БЕТТЕ

